

Città Fiera Premia la tua Classe - edizione 2020/2021

Ae Scuele primarie “J. Tomadini” di Rualis e ae Scuele de infanzie di Passons il Premi Speciâl ARLeF “Un viaç intal spazi insieme a la mê besteute preferide”

La sezion C de Scuele de infanzie di Passons e la classe 3^o de Scuele primarie “J. Tomadini” di Rualis a son lis vincidoris dal Premi Speciâl **“Un viaç intal spazi insieme a la mê besteute preferide”**, promovût de ARLeF inte suaze de iniziative *Città Fiera Premia la tua Classe*.

La iniziative de Agenzie Regjonâl pe Lenghe Furlane e jere vierte a dutis lis scuelis de infanzie e des scuelis primariis dal teritori furlanofon, cun dôs categoriis di partecipazion: la elaborazion di un dissen, pai piçui fin ai 8 agns, e di un teme par scuelârs plui grancj. Denominadôr comun des dôs categoriis al jere il viaç intal spazi, di fâ ognidun cu la sô besteute preferide. A son stadis tantis lis classis che a àn aderît ae iniziative, e a dutis la ARLeF ur à regalât un DVD cui cartons animâts in lenghe furlane o une publicazion par furlan.

Il miôr dissen e il miôr teme, invezit, a son stâts premiâts cuntun bon di 250 € ognidun, par comprâ materiâi didactics e pal insegnament. Il bon al va ae scuele de classe o dai scuelârs che a àn vinçût.

La vincidore de categorie “Dissen” e je stade, juste apont, la sezion C de Scuele de infanzie di Passons, cun cheste motivazion: “I tancj materiâi e lis technichis dopradis a son une vore particolârs e origjinâi, cun atenzion pal detai. Il lavôr al mostre ben i concets di spazi e di viaç graciis ae simpatiche pensade di un percors magnetic che al unîs ducj i dissens”.

Pe categorie “Teme”, la jurie e à premiât invezit la classe 3^o de Scuele primarie “J. Tomadini” di Rualis, graciis ae composizion de arleve Linda Miani che “e trasmet serenitât e une disposizion positive pal viaç e pe scuvierte. Ancje se curt, il test si disvilupe in maniere corete e al mostre une anime legre e une ande curiose bande chei altris”.

La jurie e à ancje assegnât dôs menzons speciâls pe categorie “Dissen”: ae 1^o B de Scuele primarie “Risultive” di Bertiûl, pal dissen di Giacomo Zilli che “al propon il viaç intal spazi tant che une mission par salvâ i animâi dai pericui che a puedin cjatâ su la Tiere, come intune sorte di gnove arcje di Noè tecnologjiche”, e ae sezion D de Scuele de infanzie di Passons, pe creazion di un album corâl che “al met adun i dissens fats dai scuelârs doprant technichis diferentis, che a mostrin la atenzion e la cure pal propri compagn di viaç.”

“L’avignî di ogni lenghe al è intes mans des gnovis gjenerazions – al à marcât il president de ARLeF, Eros Cisilino -. Par chest o vin aderît cun plasê ae iniziative Città Fiera Premia la tua classe, dedicant un premi speciâl ai tancj scuelârs des scuelis de infanzie e de primariis impegnâts intal studi de lenghe furlane. Il 76% des fameis al sielç il studi dal furlan pai siei fis, une percentuâl che e dimostre ben cemût che inte nestre Regjon e sedi simpri plui cussience dai tancj vantaçs,

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

cognitîfs e sociâi, che il plurilinguîsim al ufris. Di là dai fruts che a àn partecipât ae iniziative, o vuei ringraciâ i lôr insegnants, che a fasin un lavôr straordenari ogni dì. In tantis scuelis dal nestri teritori l'insegnament dal furlan si fâs su la fonde di chê che a nivel european e je ricognossude tant che une des metodologiis didatichis plui validis, o ben il CLIL (Insegnament integrât di lenghe e contignût)."

La colaborazion cun Città Fiera e il concurs *Premia la tua Classe* e tornarà ancje pe edizion 2021/22 e il teme che i fruts a varan di frontâ al è "Une gjite tal mont dai golosets". De sinergjie inviate pe promozion de lenghe furlane, e cjape forme ancje la iniziative "La peraule dal cûr". L'invît indreçât ai zovins al è che di condividi la peraule o la filastrocje furlane che par lôr e à un significât speciâl e spiegâ parcè. Un progjet gnûf, duncje, che la ARLeF e Città Fiera a promovin cul stes obietîf: valorizâ lis lidrîs e cjalâ al futûr.

Udin, ai 20 di Setembar dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<